

Le corps ayant esté enfeuely & exposé honnestement sur le tillac, les Peres dirent l'Office & les prieres accoustumées, après lesquelles il fut iecté dans la mer une grosse pierre attachée à son pied pour le faire couler au fond : il n'y eut qu'une seule chose en quoy on manqua, qui fut de n'auoir retenu de ses cheueux & de ses ongles, mais de ses cheueux principalement selon qu'ils ont de coustume, pour les monstrier à ses parens & à tous ceux de sa nation, à fin de leur oster toute finistre opinion qu'on l'eust tué ou submergé, car comme ils sont assez soupçonneux d'eux mesmes, il ne falloit que ce manquement là, pour les mettre en rumeur (nous dirent quelques Sauuages de nos amis) : on ne laissa pas neantmoins de faire des presens aux plus prochains parens du deffunct, pour leur oster tout suiect de plainte, & nous mettre en asseurance de ce costé là.

96 Tandis qu'on estoit occupé de l'enterrement du deffunct le Nauire suiuoit sa routte & aduança iusques à Tadouffac où ils arriuerent fort heureusement, sinon qu'ils frayerent une roche entrant au port, qui les pensa perdre, de quoy eschappez, ils rendirent graces à Dieu & mouillerent l'anchre pour le repos d'une si longue || nauigation, pendant laquelle le P. Guillaume resta tousiours sain & gaillard & le P. Irenée au contraire presque tousiours malade & incommodé, voyla comme tous n'ont pas une mesme grace naturelle ny la force & vertu de pouuoir supporter l'air de la mer & la violence des tourmentes qui causent à la pluspart des maux de cœur fort grands, lesquels neantmoins se guerissent en abordant la terre, si plustost ils ne quit-